



Vaksdal kommune

Kontrollutvalet

TIL VAKSDAL KOMMUNE V/ KOMMUNESTYRET.

ÅRSREKNESKAPEN 2017 FOR VAKSDAL KOMMUNE, UTTALE FRÅ KONTROLLUTVALET.

Kontrollutvalet har i møte 15.05.2018 handsama Vaksdal kommune sin årsrekneskap for 2017.

Representantar frå administrasjonen og ansvarleg revisor var til stades i møtet og presenterte årsrekneskapen og svarte på spørsmål.

Av rekneskapen for 2017 har kontrollutvalet merka seg at netto driftsrekneskap er positivt med kr. 24 614 333, dvs. netto resultatgrad på 5,69 % (Sett opp mot sum driftsinntekter). Gjennomsnitt for alle kommunane i Noreg (utanom Oslo) ligg ifølgje opplysningar frå SSB på netto resultatgrad på 3,8 % i 2017. Teknisk beregningsutvalg for kommunal og fylkeskommunal økonomi (TBU) tilrår at ein over tid bør ha netto resultatgrad på 3 prosent fram til 2014 for å ha ei forsvarleg økonomisk drift. Frå 2014 er dette talet nedjustert til 1,75%.

Riksrevisjonen la 16.02.2015 fram Dokument 3:5 (2014 – 2015) «Riksrevisjonens undersøkelse av kommunenes låneopptak og gjeldsbelastning». Her er det undersøkt sammenhengen mellom høg lånegjeld i kommunane, sum driftsinntekter og disposisjonsfond. Riksrevisjonen tilrår at kommunane ikkje bør ha meir enn 75 % av driftsinntektene i lånegjeld. Ved å nytte Riksrevisjonen si tilnærming kjem ein fram til at Vaksdal kommune har ei lånegjeld tilsvarende 46,7 % av sum driftsinntekter, altså godt innafor tilrådinga frå Riksrevisjonen. Tilsvarende er disposisjonsfondet på 19,2 % av driftsinntektene. Riksrevisjonen tilrår her minst 5 %. Vaksdal kommune har på bakgrunn av dette både tilfredsstillande lånegjeld, driftsresultat og disposisjonsfond for 2017.

Kontrollutvalet merkar seg m.a. følgjande frå rådmannen sin uttale i årsmeldinga:

«Året 2017, har som 2016, vore prega av store, viktige saker for kommunen. Statleg plan for ny veg og bane har skapt optimisme og framtidstru. Tryggare veg og bane saman med kortare reisetid kan gjera kommunen vår meir attraktiv å bu og leve i. Sjølv om utbygginga er i statleg regi medfører den store planleggingsoppgåver og høg aktivitet for den kommunale organisasjonen. Arbeidet med områdeplanar for «stasjonsbyane» Vaksdal og Stanghelle er starta opp og vil følgje statleg plan framover. Mange innbyggjarar har engasjert seg i arbeidet med å skape framtidsbilder for bygda si.

Kommunestyret har gjort vedtak om omfattande rehabilitering og nybygg av skulebygga som vil innebere byggeaktivitet på alle skular unntatt Eksingedalen i åra frametter. Ny skule med kultursal og basseng på Dale i 2020, rehabilitering/nybygg Vaksdal, oppvekstun på Stamnes i 2019 og oppsett og mellombels drift av modulbygg på Stanghelle i fleire år. Mange og store prosjekt over kort tid stiller store krav til planlegging og prosjektleiing. Samla er aktiviteten knytt til vedtatte investeringsprosjekt større enn nokon gong før i kommunen.

Kommunen fekk eit positivt økonomisk resultat med 8,3 millionar i overskot. Dette skuldast i hovudsak utjamningsmidlar til kommunen mot slutten av regnskapsåret, i tillegg til ei positiv avkastning på aksjar og obligasjonar. Sidan 2013 har kommunen gradvis effektivisert og tilpassa drifta til endra rammevilkår. I tillegg er det tatt grep for å redusere vedlikehaldsetterlepet på kommunale eigedomar framover. I 2017 har kommunen nådd sine mål for sunn økonomi og har klart å finansiere ein del investeringar med løpande inntekter i staden for låneopptak. Vedtatt «handlingsregel» om å ikkje bruke variable inntekter frå sal av konsesjonskraft i den løpande drifta er i så måte svært positivt.»

Det er nasjonal frist 15.02. for at årsrekneskapen skal vera ferdig avlagt. For årsmeldinga er denne fristen sett til 31.03. Kontrollutvalet har merka seg at årsrekneskap og årsmelding for 2017 ikkje vart levert innan desse fristane.

Kontrollutvalet har som oppgåve å gje uttale til kommunen sin årsrekneskap. Uttalen vert gjeve med bakgrunn i framlagd årsrekneskap, årsmelding frå administrasjonen og revisjonsmeldinga frå revisor. Kontrollutvalet tek sjølv stilling til kva forhold som skal omtalast i uttalen. Det vil vera naturleg å ta med spesielle forhold som blir omtala i revisjonsmeldinga, eventuelle revisjonsrapportar og nummererte brev. Uttalen skal sendast til kommunestyret, med kopi til formannskapet.

Oppsummering/tilrådingar frå kontrollutvalet:

- Vaksdal kommune har i 2017 tilfredsstillande lånegjeld, driftsresultat og disposisjonsfond i høve tilrådingane frå Riksrevisjonen.
- Kontrollutvalet har merka seg at årsrekneskap og årsmelding ikkje vart levert innan dei nasjonale fristane, hhv. 15.02. og 31.03. Utvalet oppmodar kommunen om å syta for at desse fristane vert haldne neste år.
- På bakgrunn av det som kjem fram i revisjonsrapport nr. 5 for 2017 frå Deloitte ber kontrollutvalet om at rådmannen kjem i møte 05.09.2018 for å gjera greie for kva som er/vil verta gjort i høve tilrådingane i rapporten.

Ut over det som nemnd over, og det som går fram av saksframlegget til kontrollutvalet i rekneskapssaka samt revisjonsmeldinga av 23.04.2018 og revisjonsrapport 2017 nr. 5 dagsett 23.04.2018, har kontrollutvalet ikkje merknader til Vaksdal kommune sin årsrekneskap for 2017.

15.05.2018

Boris Groth
kontrollutvalsleiar

Kari Nygard
utvalssekretær

Dokumentet er elektronisk godkjent og har derfor ikkje underskrift.

Kopi: Vaksdal kommune, formannskapet